

# Quants scolars van en las scolas e scolinas rumantschas?

Cifras da l'uffizi da vischnanca da l'onn 2010/2011

■ **(anr/vi) Il Grischun dumbra radund 20 000 uffants e giuvenils che van a scola e scolina en las regiuns tudestgas, talianas e rumantschas. 4270 scolars han visità il 2010/11 scolas rumantschas.** Cumenzain cun la regiun rumantscha la pli pitschna. En Val Schons datti tenor l'uffizi da scola quatter vischnancas cun scola rumantscha: Casti, Donat, Lohn e Maton. L'onn da scola 2010/11 han questas vischnancas gè 51 scolars.

## Il Surmeir ha radund 349 scolars

En las 14 vischnancas rumantschas dal Surmeir han 349 mattas e mats visità l'onn passà las scolas e scolinas rumantschas (guarda glista). La vischnanca cun ils pli blers scolars è Savognin che ha dumbra 86 uffants da scolina, dal stgalim bass e mesaun e giuvenils dal stgalim aut.

Las vischnancas dal Surmeir han reuni lur scolas primaras e scolinas en tschintg consorzis. Ils giuvenils dal stgalim aut van a scola a Savognin u a Casti.

## La Surselva ha ils blers scolars

Tenor indicaziuns da l'uffizi da scola han 34 vischnancas sursilvanas ina scola rumantscha u tarmettan ils uffants en in consorzi da scola rumantsch. Ensemen cun Glion, che porscha la pussaivladad da



**Las classas rumantschas vegnan pli e pli pitschnas. Qua la scola da Tumein.** FOTO J. MENOLFI

visitar ina classa bilinga, e cun Trin, che maina ina scola bilinga, vegn la Surselva sin 36 vischnancas cun scola rumantscha. L'onn 2010/11 han questas vischnancas gè 1980 uffants e giuvenils en la scolina ed en la scola obligatorica.

## Engiadin'Ota e Bassa

L'Engiadina Bassa e l'Engiadin'Ota na

vegnan ensemen betg sin tants scolars sco la Surselva. En l'Engiadina Bassa – ensemen cun la Val Müstair – han visità l'onn passà 892 uffants las scolas e scolinas rumantschas. Las diesch vischnancas rumantschas da l'Engiadin'Ota han gè 998 scolars che han visità il 2010/11 las scolas bilingas. La maioritad dals scolars en questa regiun na discorra betg rumantsch

a chasa. La dumbraziun dal pievel dal 2000 ha mussà che sulet S-chanf ha anc dapli che 50 pertschient abitants che discuran rumantsch. Quatter vischnancas avevan il 2000 damain che 35 pertschient Rumantschs.

## Cuira: 66 scolars e 18 scolarin

La capitala grischuna n'è sa chapescha

betg ina vischnanca rumantscha. Tuttina porscha ella a ses abitants la pussaivladad da tarmetter ils uffants en ina scola bilinga cun rumantsch. Il 2010/11 han 18 mattinas e mattets visità la scolina rumantscha e 66 scolars han visità la scola bilinga rumantsch-tudestga, inditgescha l'uffizi da scola da la citad.

## Rumantsch sco lingua estra

Sper scolas rumantschas u scolas bilingas porschan differentas vischnancas lezziuns da rumantsch sco segunda lingua, pia sco emprima lingua estra. I sa tracta cunzunt da vischnancas en la vischinanza dal territori rumantsch u da vischnancas ch'eran pli baud rumantschas. En il Grischun central èn quai: Vaz, Alvagni, Schmitten, Surava, Bravuogn, Ziràn, Runtgaglia, Andeer e Ferrera. Lura han era Domat e Razén instrucziun da rumantsch sco segunda lingua, en Surselva Flem e Sursaiisa ed en l'Engiadin'Ota San Murezzan.

\* Las cifras da scolars da scolina e scola dal 2010/2011 derivan da la pagina d'internet da l'uffizi per vischnancas.

\*\* Glion na vala betg sco vischnanca rumantscha, ma porscha la pussaivladad da frequentar ina scola bilinga. Quest onn visitan 24 uffants la scola primara bilinga e 15 uffants la scolina.

## Scolars rumantschs

Vischnanca rumantscha.	dumber da scolars*								
Casti-Wergenstein	7	Salouf	29	Zernez	119	Castrisch	40	Ruschein	44
Donat	32	Savognin	86	Engiadina Bassa cun Val Müstair	892	Cumbel	33	Sagogn	56
Lohn	4	Stierva	26	Bever	48	Degen	17	Schlans	5
Maton	8	Sur	10	La Punt-Cham.	62	Duvin	14	Schluain	39
Schons total	51	Tinizong-Rona	25	Madulain	10	Falera	49	Schnaus	12
Alvaschagn	15	Surmeir total	349	Puntraschigna	183	Glion	214**	Sevgein	30
Brinzauls	9	Ardez	38	Samedan	258	Laax	91	Siat	18
Casti	32	Ftan	50	Schlarigna	141	Ladir	11	Sumvitg	161
Cunter	26	Guarda	19	S-chanf	76	Lumbrein	34	Suraua	17
Lantsch	48	Lavin	17	Segl	72	Luven	30	Trin	135
Marmorera	1	Scuol	238	Silvaplana	52	Medel	46	Trun	127
Mon	9	Sent	93	Zuoz	96	Morissen	27	Tujetsch	133
Mulegns	2	Susch	10	Engiadina'Ota	998	Mundaun	29	Vella	44
Riom-Parsonz	31	Ramosch	1	Andiast	27	Mustér	183	Vignogn	15
		Tarasp	27	Breil	169	Pigniu	3	Vrin	28
		Tschlin	58			Pitasch	11	Vuorz	40
		Val Müstair	162			Riein	6	Surselva total	1980
						Rueun	42		